

3

IN FVNERE
^{MI}ILLVSTRISS. AC REVEREND. D.D.
^{MI}CAESARIS CARDINALIS
BARONII
Oratio.



VNESTVM, & lachrymabilem illum diem mihi memoria repetenti, quo sublatum nobis præclarissimum Ecclesiæ Catholicæ lumen Casarem Cardinalem Baronium lamentati sumus, & sepulchrales istas faces exigua illius extincti solis indicia contuenti, renouatur PP. Ampliss. infixus animo dolor, qui omnē ferē adimit ad eius dicenda præconia facultatē. Verūm non patitur tanti viri dignitas, neque grati animi debitum officium, neque vestra hæc in eum pietas, atque beneuolentia, me, licet in eo commendando longē imparem, at in diligendo nemini non parem, iam silere, vbi nulla neque gens, neque natio Christianæ Reip. reperitur, cui non sit eius iucunda laudatio, cuius acerbæ mortis magno semper erit cum dolore deploranda calamitas. Quamquam autem non ignoro materiæ grauitatem, præstantiam iudiciorum vestrorum, exiguitatem ingenij mei, & breues angustias temporis ad cogitandum mihi datas, & ad loquendum; tamen non sunt hæc eiusmodi, vt me à dicendo planē deterreant; quin potius vel iacentem animum erigunt, atque confirmant. Cum enim in Baronio dignē ac meretur exornando, ipsius eloquentiam video prorsus desiderari, nec esse quempiam tanta dicendi facultate munitum, qui, si eum laudaturus accedat, post adhibitas eloquentiæ suæ vires, consumptumque spatium longissimi temporis non fateatur excusationis veniam sibi esse.

4
tribuendam, in eam ipse sp̄s adducor fore, vt tantum mihi veniæ pro vestra benignitate concedatis, quantum & eloquentissimo cuiq. tribuere oporteret. Quod si ego à vobis me impetrasse sentiam, enitar quantum potero, vt eius admirabilis vitæ imaginem, si non expressam penitus, suisque vt par esset, coloribus exornatam; at certè delineatam leuiter, adumbratamq. cernatis. Igitur, vt indè potissimum exordiar, vndè clariora cæpit indicia virtutum ostendere, quæ illum vniuerso Orbi notissimum reddiderunt, Adolēscens, posteaquam optimis instructus artibus, & disciplinis, relicta patria, & parentibus, Romam venit, diuinoq. impellente numine; Beato parenti nostro Philippo se tradidit, à quo sanctissimis institutionibus ad Christianam pietatem informaretur, tales imprimis progressus in humilitate fecit, vt arripuisse potius eam, quàm addidicisse videretur. Cernebat bonæ indolis adolescens eximia in Philippo exempla virtutum, & quæ admirari satis non poterat, imitari pro viribus conabatur. Inuisebat eum frequentissimè, adhærebat eius lateri, obseruabat in eo diligenter quicquid decerpere posset ad exornandum quasi virtutum floribus animum suum. In quo quidem ei nunquam accidit; quod euenire in plerisq. solet, vt assiduitas familiaritatem, familiaritas contemptum faceret; sed eum ita semper colebat, quasi parentem; ita admirabatur, quasi quotidie nouum cerneret. Exindè non multo post Christianæ perfectionis desiderio incensus, & diuinæ voluntatis explendæ studio inflammatus, totos tres annos assiduis precibus, lachrymisq. vberimis à Deo flagitare cœpit, vt sibi quā vitæ rationē amplexi se vellet, ostenderet. Etenim de matrimonio cogitare nē poterat quidem; religiosæ verò, asperriamq. vitæ desiderio quamquā vehementer afficiebatur; tamen latentes fortassè Dæmonis insidias veritus, quid sibi agēdum esset, ignorabat. Tandem post multas effusas preces, vt primùm à Philippo cognouit eam esse Dei voluntatem, vt Ecclesiasticam vitam in seculo amplecteretur, continuò non acquiescendum carni, & sanguini; sed sancti Spiritus, qui bonæ menti semper occurrit, voluntati omninò sibi obtemperandum existimauit. Quapropter diuinæ gloriæ

gloriæ desiderio, suæq. ac proximorum salutis amore magis,
magisq. succensus, sacris ordinibus initiatus, & nostræ tunc
enalescentis Congregationis alumnus effectus est. Quoniam
autem intelligebat optimam futuram fuisse humilitatis, Chri-
stianæq. perfectionis acquirendæ rationē, si quam animo con-
ceperat, Philippo in omnibus obediendī voluntatē, perpetui
voti sponsione confirmasset, diuinō fretus auxilio, non prater-
misit vouere, quod cogitabat, & quod promisit, impleuit; Vt
que adeo, vt nihil vnquam aggrediretur, in quo Philippum &
suæ conscium voluntatis, & ductorem operis non haberet: ni-
mirum veluti grauissimum piaculum verebatur quicquid illo
nesciente perfecisset. Ad illius verò voluntatem exequendam
tām erat paratus, tām expeditus, tām celer, vt obtemperare
prius ipse, quām Philippus, non dicam verbis, sed nutibus im-
perare videretur. Quæ animi celeritas non in ijs solum pera-
gendis, quæ essent facilia, sed in arduis quibusq. rebus, ac dif-
ficilibus elucebat. Quarū plurimas licet afferre possem lectū,
scituq. dignissimas; Tamen, quoniam, enumerare omnia lon-
gum esset, veniam ad ea, quæ præclariora videbuntur eius hu-
militatis, contemptusq. gloriæ testimonia. Hæc verò quæ tan-
dem? Primum, quod sacerdos factus, antequām ad vllum pu-
blici honoris gradū prouheretur, illud in animo fixum pro-
posuit, votisq. nuncupatis, & iteratis (vt ipse ad Clementem
VIII. scribens testatur) sæpè firmavit, vt in priuato, simpliciq.
vitæ genere optimè instituto, & eōusque feliciter ducto, benè
præcinctus Mundi contemptu, & expeditus vsque ad obitum
permaneret: Itaque, licet eiusdem Pontificis mandato, ad su-
scipiendam Protonotarij sedis Apostolicæ dignitatem non
sine magno dolore, ac repugnantia fuerit pertractus; tamen
vbi ad amplissimum Cardinalatus gradum ab eodem Cle-
mente se promouendum sensuit, explicari non potest, quibus
precibus, quibus gemitibus, quibus lachrymis, vt illam à se
dignitatem auerteret, elaborarit. Considerabat enim (vt
ipsius verbis paulisper utar) eminentem illam, sublimemque
omnibus absolutam numeris sanctitudinem vitæ, quam exigit
durus exactor ab eo, qui Cardinalis eligendus est, illud assi-
duè

duè mente voluens, quod Dominus comminatus fuerat, iudicium videlicet subituros grauius, atque durius, maioremque condemnationem eos accepturos, qui primas indignè cathedras occupassent; verebaturque vehementer terribilem illam manum hominis contra candelabrum in pariete publico, in ipso Ecclesiæ albo scribentis, stateram, & pondera præferentis, quibus expendendus esset quilibet ad Cardinalatus dignitatem assumendus, & tanquam adulterinus procul eiciendus, ac reprobatus quisquis illis appensus inuentus fuisset minus habens. Igitur hæc ille, aliaque multa considerans, acerbissimo dolore angebatur, cum videret à tutissimo priuatæ vitæ portu se abstrahi, & ijs grauissimis honoribus cumulari, quibus sustinendis, & imbecillis sibi, pro sua humilitate, & indignus esse videbatur. Verùm quantò magis tepugnabat, tantò magis in se Pontificis studium concitabat, & merebatur negando, quod esse nolebat, eoque dignior erat, quò se clamabat indignum. Quapropter per eiusdem Pontificis familiares seorsum abreptus, & cubiculo clausus, vixque tandem, ut audiretur multum rogans, admissus ante illius conspectum, post multam defensionem, illud vnum tantum ab eo responsum accepit, quò robusta voce diram anathematis protulit sententiam, si amplius resisteret, & nisi penitus acquiesceret. Cogitate quæso, qua fuerit animi perurbatione percussus, cum talis erumpens è Cælo repente tanto fragore tonitrus, fulmen æternæ damnationis explodens, illius auribus intonuit. Quid hic faceret uir æquè obediens, atque humilis? Pareret? At propositam sibi priuatæ uitæ humilitatem diligebat. Resisteret? At plena illa terroris uibrata sententia, ut prorsus acquiesceret, impellebat. Igitur non potuit ita subactus non manus dare, quamquam non æquè animum dedit, qui, si licuisset, etiã manus retraxisset, ueluti alter Zara, maternum uterum (huius scilicet Congregationis domum) repetere mallens, quàm uinctus purpura progredi. Etenim (ut hoc etiã addam) tanto Congregationem hanc, ueluti spiritalem matrem, amore prosequabatur, ut acerbissimum sibi duceret ab ea, non dicam animo, sed

pore duntaxat vel ad breuissimum tempus posse diuelli. Quocirca in præfatione septimi anhalium tomi, dum collatam sibi Cardinalatus dignitatem deplorat, quid inter cetera dicat, attendite; [Tanquam abortiuus sum proiectus ex utero, illo videlicet, in quo semel conceptus spiritu, cupiebam formari in virum perfectum, nec exire, donec transferretur ad tumulum, ne oculus me videret. Matetnum iure dixerim vtrum domum illam, in qua post conceptionem illam meam coalescere cum fratribus meis, diemque extremum claudere absque aliqua lucis vsura, fulgore videlicet cuiuslibet dignitatis, in mentis firmo proposito erat.] Ex quibus verbis apparet non solum eius erga Congregationem hanc amor, & studium; sed & quam humilitatis appetens; & quam ab honoribus esset alienus. Iam verò, vt ad reliqua progrediamur, ad sublimem Cardinalatus dignitatem euectus an pristinam illam, & edusque seruatum deseruit humilitatem? an laxiora defluentis purpuræ ornamenta circumferens, eorum assiduitate intumescere animo coepit? an exoptare supremam illam, vno iam gradu proximam, culminis Pontificij dignitatem? Tantum adest, vt hæc effecerit, vt potius toto reliquæ vitæ suæ tempore nihil aliud magis, quam Cardinalem se esse conquerens, misero sibi datam lucem doleret, cum tolerare illius honoris munera cogeretur. Fatebatur nihil sibi gratius in vita accidere posse, quam si grauissimum illud onus aliquando deponeret: tum demum sibi videri Cælo pedem se illaturum fuisse, cum ad suum priuatæ vitæ statum rediens, Cardinalis esse desisset; id, quod non solum multis à Deo precibus; sed etiam ab ipso Pontifice flagitauit. Nihil enim ea dignitas illi noui afferebat, nisi, vt cum prodesset quidem pluribus, sibi magis metueret, ne illa sibi à Deo pro laborum suorum mercede tribueretur. Atque hinc illud extitit, vt subito Cardinalis factus, diuinæ maiestati voto promiserit, nihil se vnquam facturum, quo viam sibi patefaceret ad Pontificiam dignitatem consequendam: quod deinde sic præstitit, vt potius ea gesserit, quibus intercludi sibi ad illam aditum sentiebat. Nimirum non à conciliata sibi Regum, ac Principum gratia, non

ab humanis, quæcunque illa essent, præsidij, sed à solius Dei cupiebat voluntate pendere, si quid tandem honoris sibi aliquando contingere potuisset; cum interim non id quæreretur ipse, sed fugeretur, immo verò, ut Helias aquam ad ligna flammis de Calo deductis, comburenda, sic ille ad dignitates arendas contraria, quantum in se ipso erat, apponeret: sua, videlicet animi demissione contentus, & ab omni cupiditate gloriæ remotissimus. Atque hæc humilitatis virtus, ut in eo maxima, sic semper aliarum fuit sæcunda parens, custosque virtutum, in quibus profectò sic enituit, ut si explicare singulas vellem, vix ad finem posset oratio peruenire. Quid enim dicam, de effusa illa in eleemosynis erogandis largitate, cuius illud præclarum adhuc adolecens indicium præbuit, quod, ut cuiusdam familiæ egestati subveniret, quam audierat à concionatore Populo commendari, cum nihil aliud tunc, præter tria solum haberet indusia, quæ à parentibus nuper acceperat, ea in eleemosynam libentissime tradidit, alienæ magis consultor inopiæ, quàm subleuator suæ? Quid dicam de eleemosynis, quas deinde Cardinalis creatus admirabili charitate largitus est? Hac Sanctorum Martyrum Nerei, & Achillei Ecclesiæ penitus collapsam restituit. Hac Sancti Gregorij cognomento magni, templum exornauit: Sanctæ Sylviæ eiusdem Gregorij matris memoriæ erexit, atque illustravit. Hac religiosæ Franciscanæ familiæ fratribus, quos Capuccinos vocant, Soræ monasterium à fundamentis extruxit. Hac puerorum, ac puellarum, quæ Dispersæ nuncupantur, patrociniū suscepit: religiosorum coenobijs ea, quæ ad victum necessaria erant, frequenter suppeditavit: Virginibus Deo dicandis dotes impertiuit: Inopes, ac præcipuè peregrinos humaniter hospitio excepit, ac sustentavit: plurimos singulis quibusque mensibus certis stipendijs aluit; omnium denique necessitates quantum potuit, ac fortassè etiam plusquam potuit, subleuavit; ut propterea mirandum non sit eum sua ferè omnia tam celeriter in eleemosynam tribuisse, quando, si potuisset, multo plura, charitate compulsus, libentissime erogasset. Age iam, quid dicam tantam illius erga se in ijs,

quæ

9
quæ ad corpus pertinent, extitisse seu dritatem, vt vel grauissimis defessus laboribus nunquam ad satietatem, vix ad necessitatem somnum caperet? & quatuor tantum, aut quinque ad maximum contentus horis, reliquam noctem somno quidem vacuam, sed orationibus, ac studijs plenam traduceret? Mitto, quod is erat in eius vestitu, ac supellectili modus, vt etiam in Cardinalis dignitate constitutus, indumentorum elegantiam, & domesticorum parietum ornamenta repudiaret. Taceo perpetuam in cibo, potuque parsimoniam, quæ, vt ad laborum cursum perficiendum expeditior esset, utebatur. Non dicam piam illam consuetudinem Urbis Xenodochia, manè, ac vespere adeūdi à Beato Philippo sibi olim impositā, & à se per nouem annos adeò sine vlla intermissione seruata, vt ne febris quidem laborans ab ea vnquam desisteret, in quo illi non rarò diuinitus accidit, vt deinde domum incolumis, ac benè valens reuerteretur. Non commemorabo assiduū illum, atque constantem in excipiendis confessionibus, & in sermonibus ad Populum ter, aut quater in hebdomada per quadraginta, & amplius annos habendis laborem, ac diligentiam; in sacrosancto Missæ sacrificio quotidie celebrando religionem, erga sanctissimam Virginem Dei genitricem MARIAM eximiam pietatem, erga Beatos Apostolos Petrum, & Paulum animi studium, & in eorum Basilica quotidie inuisenda admirabilem per multorum annorum spatia perseuerantiam; à quo pietatis officio nec æstiu solis ardoribus, nec glacialis hyemis, ventorumque asperitate retrahebatur. Omitto eius in rebus opportunè gerendis prudentiam, modestiam in prosperis, in aduersis fortitudinem, in omnibus cælestis præsidij fiduciam, & stabilem cum ipsius Dei voluntate consensum. Illum velim Auditores vobis ante oculos inspiciendum ponatis æstu autem diuinæ gloriæ zelum, & in Ecclesia Catholica defendenda, amplificandaque studium singulare, quo sic perpetuò flagrauit, nihil vt vnquam esset, aut reperiri posset tam arduum, tam laboriosum, tanta periculorum multitudine vallatum, quod ei suaderet aliquando, vt taceret, aut dissimularet, aut prætermitteret,
B . quod

quod pro diuini nominis gloria, Ecclesiæque dignitate
 tuenda omninò sibi agendum esse iudicasset. Hinc Christia-
 na illa, & Apostolico viro digna in loquendo, scribendoque
 libertas, à qua inuictum eius animum non dicendæ veritatis
 admiranda nouitas, non inanis hominum timor, non vanæ
 spes, non indoctorum dicta, vel facta, non aduersantium ora,
 vultusque retardare potuerunt. Intelligebat enim verbis
 suis vetustiore esse veritatem, eamquè rebus omnibus, quæ
 caduca sunt, antiquiorem sibi esse debere; neque dubitan-
 dum, quin illa semper de suis hostibus triumphum esset glo-
 riosissimum reportatura. Et hic eius veritatis amor, & Ec-
 clesiæ Catholicæ, quam sibi veluti carissimam sponsam ele-
 ctam, dilectamq. tueri cupiebat, zelus ardentissimus tantum
 illi suppeditabat acumen ingenij, tantam verborum, senten-
 tiarumque grauitatem, vt aduersus Ecclesiæ inimicos non
 verba dicere, sed fulminare; non scribere, sed tela iacere, eos-
 que altius cruentare, atque interimere videretur. Hic ego
 PP. AA. de illius annalibus pauca dicturus, rogo, obtestorque
 vos, vt me pro vestra benignitate paulò attentius audire non
 grauemini. Neque verò orationem meam, quæ ad finem ac-
 cedit, in referendis Beato parenti nostro Philippo gratiarum
 actionibus, insumam, quas illi Baronius in octauo suorum an-
 naliū tomo vberimas refert, quippe quòd in ijs conscriben-
 dis cum habuerit ob iteratas sæpè iussiones auctorem, impul-
 sorem, semper astantem operi, vrgentem præsentia, instantem
 verbis, & quasi quotidiani pensi, atque operæ exactorem:
 Neque in laudanda illorum veritate, ordine, stylo, multitu-
 dine, quos ille quamquam innumeris tum publicis, tum do-
 mesticis occupationibus detentus, nemine collaborante per-
 fecit, ac septies in Oratorio nostro, (vbi quotidie excepto sab-
 bato quatuor sermones à nostræ Congregationis sacerdoti-
 bus habentur) repetiuit: Sed hoc vno contentus ero, si quan-
 tum indè utilitatis in Ecclesiam Catholicam promanarit, bre-
 uiter demonstraui. Itaque reducite quæso vobis in memo-
 riam scelestos illos, ac nefarios hæreticorum impetus, quibus
 olim in Ecclesiam inuadentes, vel prostrernere penitus eam, si
 potuiss-

potuissent, vel certè grauiter affligere conabantur. Quantum elaborabant, & iniquis machinationibus, ac dolis moliebantur, vt diuinum verbum, & sacrarum historiarum antiquitatem peruerterent, aut abolerent, confarcinatis ab incunte Ecclesia vsque ad pleraque secula centurijs, vndè expugnari antiquarum traditionum veritatem posse sperabant? Quid non egerunt, vt Sanctæ Romanæ Ecclesiæ Catholicæ potestatem omnem, vel funditus euersam, vel maximè debilitatam, atque imminutam viderent? Verùm quod fuit Ecclesiæ Catholicæ gaudium, quæ lætitia, cum vidit ex aduerso consurgere nostrum hunc Ducem antesignanum Cæsarem Baronium, prælia Domini præliaturum, eaque victoriæ monumenta præferentem, annalium, inquam, volumina, quibus veluti obiectis lapidibus, & laborantem tueretur Ecclesiam, & confractis inimicorum telis, eisque penitus debellatis, triumphale carmen, tota sibi Ecclesia gratulante, decantaret? In quo quidem certamine qualem ille victoriam est consecutus, nisi eam, quam exoptabamus vniuersi? Nam si Apostolicas traditiones, & legitimos Ecclesiæ ritus ita explicatos iam, & illustratos esse gaudemus, quis magis, & explicuit, & illustrauit, quàm Baronius? Quis sacras plerasque synodos in occultis tenebris delitescentes, & ob præposterum ordinem, vel altum silentium, haud satis manifestas, accuratius conquisiuit, & quodammodo rediuuas fecit, quàm Baronius? Quis præterea sanctorum martyrum res præclare gestas, labores, victorias & suo ordine aptè disposuit, & maiore veritatis luce collustrauit, quàm Baronius? Denique quis eius doctissimos euoluat Annales, qui expressum vbiq; non videat acerrimum Catholicæ Fidei propugnatorem, defensorem antiquitatis, hæreticorum malleum, veritatis custodem, vindicem Ecclesiasticæ potestatis? O virum æternæ memoria dignissimum! qui ea facere potuisti, quæ semper omnis ætas admirabitur, quæ posteritas alet, quæ uigebunt immortalitate omnium subsequentium seculorum.

At quid nunc mihi animum concutit? Dicam, an taceam? En conuersum est in luctum gaudium nostrum, & extrema

gaudij luctus occupat. En quod mortale fuit, periit; quod nolebamus, aduenit. O deplorabilem tanti viri iacturam! O acerbam mortem, quæ tantum nobis præsidium sustulisti! Vbi nunc, Auditores, Caput illud ob antiquam cæsariem reuerendum, refertissimus sapientiæ thesaurus, rerum omnium gestarum absolutissima bibliotheca, viuumque compendium? Vbi illa manus, quæ tot antiquorum scripta euoluere, tam laboriosum, ac immensum eruditissimorum annalium opus inchoare, ac ferè ad extremum perducere terminum potuit? Vbi, inquam, manus illa, quæ duodecim annalium tomos dum extruxit, totidem videtur in Ecclesia militanti posuisse, cælesti illi ciuitati consimilia fundamenta? aut certè quemdam quasi hortum deliciarum, in quo pacis tranquillitate donatis solatium capere, & varios, iucundissimosque decerpere liceat sapientiæ flores? aut denique turrim fortissimam videtur erexisse militaribus præsidijs communitam, vnde belli tempore aduersus Ecclesiæ Catholicæ hostes arma sumere, ac strenuè dimicare possumus? Vbi totius corporis dignitas, qua veluti quodam venerabili indumento excelsus ille animus vestiebatur? Vbi Sol ille, qui totam illustrabat Ecclesiam? Vbi columna illa solidissima, cuius firmitate Catholicæ Ecclesiæ domus fulciebatur? Proh dolor! occidit sol, obscuratus est splendor eius, retraxit lumen suum, & quæ steterat columna, iam concidit. Et poterit nunc quisquam nostrum Auditores, in ædificio domus Ecclesiæ coagmentatus, & eiusdem Fidei, charitatisque coniunctione compactus non sentire tam grauem casum, non contremiscere, non commoueri? Poterit hæc vniuersa Ciuitas, cui tanti viri conspectu, & colloquio frui iucundissimè licuit, non deplorare, non conqueri; dum exterarum regionum incolæ, ad quos eius solum scripta, famaquæ perueniant, auditam duntaxat illius ægrotationem sic lamentantur, vt, quas Romam scribebant literas, plenas doloris, non tam atramento exarata, quàm fluentibus lachrymis conscriptæ esse viderentur? Quod si eos tantus ex illius morbi fama dolor inuasit; quæ suspiria, quas lachrymas, quæ doloris sunt

argu-

argumenta præbituri, cum intelligent Cæsarem Cardinalem Baronium, sibi amantissimum, morte sublatum? Ergo nos non commoueamur animo præsentibus, quando qui longissimè absunt, vnà cum Baronio quodammodo conciderunt? Vereor sanè (quod ferè pudet me dicere) ne ab exteris vt dolore, sic & amore superemur: nimirum nescio quo modo minoris facere videamur propria, quæ maximè suspiciunt alieni. Deus immortalis! quas voces, quos gemitus exaudiremus etiam mortuorum, si & illi quoque vociferari, & nos illorum sonos auribus percipere valeremus? immò verò, quid ego mortuos commemoro? imagines quoque (si fas est dicere) templa, antra, solitudines, lapides ipsi, si possent, cōclamarent, debitas videlicet Baronio exequias persolutura, à quo suam, quam habent in hominum memorijs vitam, se accepisse testarentur. Et poterit quispiam nostrum ne signum quidem debiti doloris ostendere, cū eum amiserimus, qui suis tum exemplis, tum scriptis ad Christianam fidem, pietatemque mirificè impellentibus, spiritualem gratiæ vitam, plurimis in Christo genitis filijs Deo adiuvante largitus est, genitos aluit, & ad æternam vitam, felicitatemque transmisit? Quid? quod immanissimi Catholicæ fidei hostes triumphare sibi gaudio nunc videntur, quòd Baronium amiserimus: nos verò, quibus inimicorum nostrorum lætitia dolor esse debet, ea carebimus pietate, vt neque de nobismet ipsis doleamus? Nescio, quid iam amplius dicam Auditores. Dolere vos quidem pro tanti viri amissione, vt par est, & vester hic luctus ostendit, crediderim: Ego verò, dū id vobis persuadeo, ita me afflicto sentio, ita debilitatum, vt planè necesse sit lenire paululum dolorem meum. Verū in quo tandem me ipse consolabor? Laudaui Baronium, quia talem habuimus, qui dignissimus fuit, vt omnium ore laudetur. Dolui, quia eum amisimus, quem nobis vtilissimum sentiebamus. Iam verò quid superest, in quo recreari animus possit? Num cogitabo eum hac lege natum, vt mori aliquando debuerit? sed consolatio hæc est peruulgata maximè, qua vna se à luctu temperare solent etiam ij, qui spem æternæ vitæ non habent.

Eo me igitur solatio consolabor, quòd illud in Cælis præmium
 te percepisse arbitror Baroni, quod tuis optimis virtutum me-
 ritis debebatur, quippè cum talis mors tua fuerit, quæ benè
 anteaquæ vitæ cumulata responderit. Etenim Auditores,
 postquam certum mortis suæ tempus, singulari Dei benefi-
 cio prænouerat, quod etiam in quibusdam schedulis nota-
 tum reliquit, ac sæpè prædixit, quamquam extremum illum
 diem semper in omni vita meditari consueuerat, ita vt non in
 mente solum, sed etiam in sigillo, quo literas obsignabat,
 mortis imaginem retineret impressam, & quicquid audiret,
 quicquid loqueretur, quicquid ageret, perenni mortis, iudi-
 cijque meditatione condiret: tamen vt ad eam non nisi pa-
 ratissimus, & quasi expertus accederet, singulis diebus, præ-
 cibus ab Ecclesia institutis, spiritum suum Deo Optimo Ma-
 ximo, quasi quotidie moriturus, commendabat. Itaque
 appropinquante iam morte, quam à se diù expectatam lætus
 excepit, cum corporis viribus ob diuturnos labores, & in-
 ediam penitus exhaustis, iaceret in lectulo, perpetuam illam
 cogitans æternitatem, & dulcissimum IESV nomen iden-
 tidem repetens, sacramentis omnibus piè susceptis, intentis
 in Cælum oculis, post diem festum Sanctorum Petri, & Pauli,
 sub eorum patrocinio placidissimè efflauit animam, & vt con-
 fidimus, in beatissimam illam cælestium animarum Patriam
 euolauit. O te felicem; cuius benè actam vitam felicior
 mors, mortem verò felicissima vita consecuta est! Hoc
 meum est gaudium, hoc leuamen doloris mei. Quod in te
 fuit immortale mors vlla non læsit, & quod mortale surri-
 puit, illud est gloriosius redditura: Quamquam non hoc
 vno duntaxat animi mei lætitia continetur, sed illud acce-
 dit, quòd nos, & vniuersam Ecclesiam, sicut viuens in terris
 summopere diligebas; ita sperandum est fore, vt in Cælo
 iam positus tuis apud Deum precibus multò magis, quàm
 antea protegas, atque defendas. Nostrum nunc est Audi-
 tores, vt mæsti de illius discessu, læti de felicitate, non so-
 lum eius memoriam summa cum charitate celebremus; sed

Eo me igitur solatio consolabor, quòd illud in Cælis præmium te percepisse arbitror Baroni, quod tuis optimis virtutum meritis debebatur, quippè cum talis mors tua fuerit, quæ benè antea vitæ cumulatè responderit. Etenim Auditores, postquam certum mortis suæ tempus, singulari Dei beneficio prænouerat, quod etiam in quibusdam schedulis notatum reliquit, ac sæpè prædixit, quamquam extremum illum diem semper in omni vitâ meditari consueuerat, ita vt non in mente solum, sed etiam in sigillo, quo literas obsignabat, mortis imaginem retineret impressam, & quicquid audiret, quicquid loqueretur, quicquid ageret, perenni mortis, iudicijque meditatione condiret: tamen vt ad eam non nisi paratissimus, & quasi expertus accederet, singulis diebus, precibus ab Ecclesia institutis, spiritum suum Deo Optimo Maximo, quasi quotidie moriturus, commendabat. Itaque appropinquante iam morte, quam à se diù expectatam lætus excepit, cum corporis viribus ob diuturnos labores, & in ediam penitus exhaustis, iaceret in lectulo, perpetuam illam cogitans æternitatem, & dulcissimum I E S V nomen identidem repetens, sacramentis omnibus piè susceptis, intentis in Cælum oculis, post diem festum Sanctorum Petri, & Pauli, sub eorum patrocinio placidissimè efflauit animam, & vt confidimus, in beatissimam illam cælestium animarum Patriam euolauit. O te felicem, cuius benè actam vitam felicior mors, mortem verò felicissima vita consecuta est! Hoc meum est gaudium, hoc leuamen doloris mei. Quod in te fuit immortale mors vlla non læsit, & quod mortale surripuit, illud est gloriosius redditura. Quamquam non hoc vno duntaxat animi mei lætitia continetur, sed illud accedit, quod nos, & vniuersam Ecclesiam, sicut viuens in terris summo opere diligebas; ita sperandum est fore, vt in Cælo iam positus tuis apud Deum precibus multò magis, quam antea protegas, atque defendas. Nostrum nunc est Auditores, vt mæsti de illius discessu, læti de felicitate, non solum eius memoriam summa cum charitate celebremus; sed

egre-

15

egregias virtutes, quibus in æterna luce constitutus, & cum
Deo ipso coniunctus est, sic imitemur, vt ipsi tandem
aliquando ex labore ad quietem, ex caligine ad
lucem, ab exilio hoc misero ad felicissimam
Patriam, ab hac funesta lachrymarum
valle ad supernas beatorum
ciuium sedes commigra-
re valeamus.
Amen.

*

L A V S D E O.

